

San Pablo Colosas Vɯ'ejoopo pa'inare chu'o tocha saosi'ea'me

Chu'o saosi'ea'me

¹⁻² Chu'u, Pablo, Diopi chiiuna Jesucristo saosi'kuɸi ija'ova utija'ova mai majapãiɸja'iu Timoteona'me tocha saomɸ musanɸkonare, Colosas vɯ'ejoopo pa'inare, re'oja'che pa'ijɸ Cristo'te cho'ochē masi cho'okainajeɸ chukuna majapãijanare. Mai Ja'ku Diopi musanɸkona rekoñõãna re'oja'che pa'iche'te cho'okaiuna re'oja'che pa'ijũ'u.

Jesure cuasanare Pablo Diore s̃ekaiche'te kuamɸ

³ Chukuna musanɸkonani s̃ekaijɸ Maire Paaku Jesucristo Puka'kure Diore si'arumɸ, “Re'orepamɸ, Ja'ku”, chiijɸ pa'ime. ⁴ Musanɸkona Jesucristoni masi cuasajɸ chekunare Dios neenare ũcuanɸkore oijɸ re'oja'che cho'okaijɸ pa'iche asinaa'me chukuna. ⁵ ũcuachi'a Jesucristo'te cuasache kuachɸ'o ũcuarepare musanɸkona apeasarumɸpi vɯa, Repau pa'icheja sani re'oja'che pa'ijachere cuasajɸ pojojɸ cha'ajɸ pa'ijɸasome musanɸkona. Musanɸkona pãi oichena'me Diore cuasache'te asa, “Re'orepamɸ, Ja'ku”, chiijɸ pa'ime chukuna Repau'te Diore. ⁶ Pãipi Jesucristo'te cuasache kuachɸ'ore chu'vajuna cheja si'acheja pa'ina pãi asa ch̃ã na'a jainɸko Jesuni cuasajɸ jovo re'oja'che pa'ime chura. Musanɸkona repachɸ'o ũcuarepa Dios pãire oiɸ cho'okaiche kuachɸ'o asa ch̃ã Repau'te cuasajɸ jovorumɸpi vɯa pa'icheja'che re'oja'che pa'ime repana. ⁷ Chukunana'me Cristo'te cho'ochē masi cho'okaikuji chukuna cuasaku Epafrapi

che'choasomu jā'a musanukonare. ⁸ Ūcuachi'a Dios Rekochoji cho'okaiuna musanukona chekunare oiju re'oja'che cho'okaiju pa'iche'te ra kuasi'kua'mu repau Epafraſ chukuna'te.

⁹ Jā'ajekuna chukuna musanukona re'oja'che pa'iche asaumucusepi vua cuhama'ñe Dioni sēekaiju pa'ime, musanukonapi Repau chu'ore na'a rua asa chēaju Repau chiiche'te peore masiju, re'oja'che pa'imasia'ju chini. ¹⁰ Jā'aja'ñe pani Maire Paaku neena pa'iche pa'iju Repau chiiche'te si'arumu cho'oju chekunani si'ache re'oja'che cho'okaiju Ūcuuna'me na'a re'oja'che pa'ijanaa'me musanukona, Repau pa'iche'te na'a rua masiju. ¹¹ Ūcuachi'a Repau'te Peore Masiuji Re'oku'te sēekaimē chukuna musanukonapi re'oja'che cho'o koka paa'ju chini. Ūcuachi'a musanukonapi pa'imasiu cu'ache ti'jñetojē'e juvomasiju, “Pani etajaiche cua-soma'ñea'me ie”, chiima'ñe ūcua pojoju re'oja'che paapu chini sēekaimē chukuna. ¹² Jā'aja'ñe pani musanukona mai Ja'ku Diore pojoju, “Re'orepamu, Ja'ku”, chiju pa'ijanaa'me. Musanukonare rekoñoã re'ojarekoñoã care'vakaisi'kua'mu Repau, Repau neenare ĩsijachere Repau pa'ichejana sani kooa'ju chini. ¹³ Mai vati chēa paacojñonajeju cu'ache pa'iju chijachejaja'che pa'isinare tua Dios Repau Mamakuni Repau rua cuasakuni maini jo'kasi'kua'mu, maipi Ūcuu chu'ñe'te cho'oju paapu chini. ¹⁴ Chura Dios mai cu'ache cho'osi'e jo'e cuasama'mu, Cristo jūni ro'ikaisi'ejekuna.

Cristo jūni ro'ikaisi'ejekuna Diona'me re'oja'che pa'ire'ochē'te kuamu

¹⁵ Repau Cristo Dios Ñoma'kuja'iu maire Ñosi'ku chareparo cakua'mu. Chekuna vajuva'na ūcuuko cho'je cho'ocojñosiva'naa'me. ¹⁶ Diopi chu'ñuna

Repau Cristo peore cho'oasomu. Chejana'me cunaumu, repachejña pa'ichena'me repachejña pa'inare, ñoñena'me ñoma'ñe, ñonana'me ñomanare, pã chũ'unana'me ángeles chũ'unana'me vati chũ'unare ũcuanukore cho'oasomu Repau na'a pa'isirumu repana ũcuanuko Repau'te ña pojoa'ju chini. ¹⁷ Cheke peore chuta'a pa'imarumu Pa'ikujeku peore Paaku chũ'uku'mu Cristo, re'oja'che paa chini. ¹⁸ Pãiu repau ca'nivu'te paacheja'che Repau'te cuasakuanupu'te paamu Repau. Repauji cho'ouna pa'inaa'me mai. ũcuachi'a peore chũ'uku pasa chini charo jũni vajuraisi'kuasomu Repau. ¹⁹ Repau Cristo Diopi chiiuna ũcuauja'ijeku Repau pa'iche peore ũcuaja'che pa'iku'mu. ²⁰ Jã'aja'ñe Pa'iku'te chejana raoasomu Repau, Repauji kurususẽ'verona jẽ'jocojño chie rao mai ũcuanuko cho'ochete cu'are jũni ro'ikakuna maini ũcuanukore ũcuana'me re'oja'che pa'ire'oa'ku chini, cheja pa'inana'me cunaumu pa'inare.

²¹ Aperumu musanukona cu'ache cho'onajeju rekoñoãpi Repauni cuheju Repau paacojñomana pa'isinaa'me. ²² Jã'ata'ni irumu Jesucristo pã ca'nivu paaku maire jũni ro'ikaisi'jekuna Diona'me re'oja'che pa'ire'omu maire. Maipi Repau chiiche re'oja'chechi'a cho'ojũ rekoñoã cu'achejẽ'e peojũ Repauna'me pa'ijũ Repau neerepana paapu chini jã'aja'ñe cho'okaniasomu Repau. ²³ Jã'aja'ñe paũ chini Jesure cuasache cuhasoma'ñe ũcu cuasaju pa'ijũ'u. ũcuachi'a musanukona asa chẽa cuasache Jesucristo'te cuasache kuachu'o kuache Repau re'oja'che ĩsijache pojojũ cha'ache ũhasomanejũ'u. Repa chu'o chu'u Pablo chekunana'me si'achejña ku'iu chu'vaku pa'iku'mu.

Diopi jo'kauna Pablo Jesure cuasakuanupu'te

cho'okaiu pa'isi'ere kuamu

²⁴ Chura musanukonani chu'vaku cu'ache ti'jñecojñokuta'ni pojomu chu'u. Jā'aja'ñe cho'ocojñoku Jesucristoni cho'okaiu Repau ca'nivuja'ñe pa'inani Repau'te cuasakuanupu'te cho'okaiu Repau cho'ocojñoñeja'ñe chu'u ca'nivuji cu'ache cho'ocojñoku cho'okaiu pojomu chu'u. ²⁵ Diopi chu'uni musanukonani Repau chu'ore peore kuakauu chini jo'kauna Jesure cuasakuanupu'te cho'oche cho'okaiu pa'iku'mu chu'u. ²⁶ Repa chu'o rua jeerumu aperumu kuamanesichu'o irumuna Diopi maini Repau neenani kuuna ũcuare chu'vamu chu'u. ²⁷ Dios maipi Repau neenapi aperumu kuamanesichu'ore judío peonani Repau chu'o Jesucristo'te cuasache kuachu'ore kuaju paapu chini jo'kasi'ku'a'mu. Ija'che chiimu repa chu'o kuache: Jesucristoji maini ja'me pa'iuna Dios pa'ichejare sani pa'ijanaa'me mai.

²⁸ Chukuna Repau Cristo pa'iche'te pāi ũcuanukore kuaju masi chu'vaju re'oja'che che'choju pa'inaa'me repanapi asa chēa Repauni cuasaju jovo karama'ñe re'oja'che paapu chini. ²⁹ Cristoji chu'uni cho'okaiuna chu'va koka paaku peore cho'ore'ochetu'ka cho'oku pa'iku'mu chu'u.

2

¹ Musanukonapi masia'ju chini kuamu chu'u ie: Musanukonare Colosas vu'ejoopo canare re'oja'che cho'okasa chini chekuna ũsetota'ni ũcua cho'oku pa'iku'mu chu'u, ũcuachi'a Laodicea vu'ejoopo pa'inana'me chu'ure chuta'a ñamanani. ² Musanukonapi ũcuanuko ũcuate'e cuasaju sāiñechi'a oiju pojoju pa'iju Dios chu'o kuache'te masirepa asa chēa cuasaju re'oja'che paapu chini cho'okaimu chu'u.

Ūcuachi'a aperum vesusi'e Dios churana Raosi'ku Cristo pa'iche'te masiju Ūcuana'me re'oja'che paapu chini cho'okaimu chu'u. ³ Repa Cristochi'aa'mu maire Cho'okaiku, maipi Dios chu'o re'oja'chere karama'ne asa masiju re'oja'che paapu chini. ⁴ Chekunapi musanukonani joreju re'oja'cheja'che i'kaju te'eujẽ'e cacu'omanea'ju chini i'kam chu'u ja'a. ⁵ Musanukonare ja'me pa'ima'kuta'ni chu'u rekochoji ja'me pa'icheja'che cuasaku'mu chu'u. Musanukona re'oja'che pa'iju Cristo'te masirepa cuasaju pa'iche'te asa ruu pojomu chu'u.

Cristo neena mama pa'iche'te kuumu

⁶ Jã'ajekuna Maire Paakuni Jesucristoni cuasaju Repa neena pañu chini jovosinajeju Repa'te cuasache'te ũhasoma'ne ũcu cuasaju re'oja'che pa'ijũ'u. ⁷ Repa'te ja'me pa'iche'te jo'kasoma'ne musanukonare che'chos'ere Dios chu'ore na'a ruu che'che Repa'ni na'a ruu masi cuasaju si'arumu, "Re'orepamu, Ja'ku", chiju pojoju pa'ijũ'u.

⁸ Ñarepaju pa'ijũ'u; paipi musanukonani joreju chẽa paañu chini repana peoche cuasache'te che'choju. Cristo pa'iche che'chomanaa'me repana. Rupu pa cuasachena'me paï jeerumu cho'osi'ena'me Diore cuasacuhena chũ'u'ne'te che'chonaa'me repana.

⁹ Repa Cristo paï ca'nivu paasi'kuta'ni Diojeku Dios pa'iche peore ũcuaja'che pa'iku'mu. ¹⁰ Musanukonare ũcuachi'a Cristoji ja'me pa'ina Dios chiiche re'oja'che pa'ire'omu, Cristoji paï chũ'unare, ángeles chũ'unare, vati chũ'unare ũcuanukore na'a ruu masikuna. ¹¹ Ūcuachi'a Cristo neenajeju rekoñoã Ūcuani re'ojarekoñoã care'vacojñosinajeju jikora'muru chã'tiru pa'ica'niru

chuto tuacojñosinaja'ñe pa'ime musanukona. Pãi cho'оче circuncisión ca'nivuaã chutocojñomanesina Cristoni circuncisión cho'ocojñosinaja'ñe pa'ime musanukona cu'arekoñoã Ūcuatni re'ojarekoñoã care'vacojñosinajeju. ¹² Musanukona Repau'te Dios vasosi'ere cuasaju okoro'vecojño aperumu cu'ache pa'isi'ere jo'kaso Repauna'me tãcojño vajuraisinaja'ñe pa'iju mama pa'ime chura.

¹³ Aperumu musanukona judío peona ũcuanuko Dios pa'iche'te vesuju cu'are cho'oju Repau sējocojñosina pa'isinaa'me. Irumuta'ni Dios musanukonare Cristo cho'okaisi'ejekuna pa'iche mamare jo'ka musanukona cu'ache cho'osi'e cuasama'mu. ¹⁴ Aperumu maire pãi Dioni pōsero'ire paajuna Repau aperumu chũ'u jo'kasi'e cho'оче pa'isi'kua'mu. Jã'ata'ni irumu Dios maire ro'ikakuna jã'aja'ñe cho'оче peomu. Pãi cu'ache cho'osinare repana cu'ache cho'osi'e ro'i kurususẽ'verona jẽ'jo repana cu'ache cho'osi'ere kujaju tocha suome. Repa tochasi'e kuache cu'a jũni ro'isome repana. Ūcuaja'che Cristo jũni ro'ikaisi'ejekuna mai pōsero'i tochasija'ova kurususẽ'verona jẽ'jo suosi'ēja'che cho'osi'ejekuna peore ro'isi'ea'me chura. ¹⁵ Repau Cristo mai cu'are ro'ikaiu kurususẽ'verona jũni maire cu'ache chũ'unare cajejani repana chũ'ũñe tuasokaniasomu. Repa tuakaisi'e pãi jainuko masime.

Cristona'me jũni vajuraisinaja'ñe pa'iche'te kuamu

¹⁶ Jã'ajekuna musanukona pa'iche'te pãipi ña ãu aĩñena'me ũkuche te'emajñaruã ũseto jachajũ'u repanare. Ūcuachi'a Diore pojoj judío fiesta cho'оче'te chũ'uju puaumucujña cho'оче cho'оче'te ũseju ke'reto jachajũ'u repanare. ¹⁷ Jã'amajñaruã cho'оче maipi cho'oju che'che re'oja'che pa'ijachere cha'aju

paapu chini aperummu chũ'u jo'kasi'ea'me. Jã'ata'ni repa re'oja'che pa'iche Jesucristo'te cuasaju jovo pa'iche'me. ¹⁸ Angeleva'nare pojonapi ke'renare jachajũ'u. Repana rekoñoã, “Rua masi'u'mu chu'u”, chini cuasanata'ni pãipi asa ũcuanani pojoa'ju chini, “Rua vesu'u'mu chu'u”, chiime. Ūcuana cuasache'te kuaju, “Dios ñoñe'te ñaju kume chukuna”, chiiju joreju, meñe rua pojonaa'me repana. ¹⁹ Cristo'te mai rekochoja'che pa'iku'te cuasache jo'kasosinaa'me repana. Maita'ni Repau neerepanajeju Repau ca'nivuja'ñe pa'inaa'me. Diopi chũ'ukuna mai rekochoja'che pa'iu maire si'arumu cho'okaiu pa'iku'mu Repau, maipi na'a rua che'cheju si'arumu na'a re'oja'che paapu chini.

²⁰ Chura musanukona Cristona'me jünisosinaja'ñe pa'iju Repau'te cuasamana pa'icheja'che pañu chiimanaa'me. Jã'aja'ñe pa'inata'ni, ¿je'se pa'ina repa chũ'ũñe chuta'a cho'ouache cuasache? ²¹ Ija'che i'kaju si'ache chũ'ũnaa'me repa: “Chẽamanejũ'u jã'amajñarũã; ãimanejũ'u jã'amajñarũã; jã'ajamajñarũã miimanejũ'u”, chiinaa'me. ²² Peore jã'amajñarũã sẽ'sevu cho'omajñarũã rupu pãi cuasaju chũ'ũñejeku si'asojachea'me. ²³ Chekurumu pãi jã'are cho'uju chekunapi ñato re'oja'cheja'che ñoñe pa'ime. Chekurumu rua masinaja'ñe pa'iju, Diore rua pojona'ña pa'iju, meñe pojoma'ñeja'ñe pa'iju cu'ache cho'uche ãseju na'a rua ãseju pa'inaa'me repa. Repa jã'amajñarũãchi'a cho'ona repa rekoñoã cu'ache cho'ouache cuasacheta'ni juvoma'ñe ũcua cho'uju pa'inaa'me.

3

¹ Cristona'me jüni vajuraisinaja'ñe pa'iju re'oja'che pa'inaa'me musanukona. Jã'ajekuna Dios pa'icheja

sani pa'ijache cuasana pa'iche pa'ijũ'u. Repau Cristo ũcuachejare pa'ieu Diore kueñe ujjajũtucaakã'kore ñu'ieu chũ'uku pa'ieasomu. ² Cheja pa'imajñaruãchi'a cuasaju pa'ima'ñe cunauumu pa'iche'te na'a ruu cuasaju pa'ijũ'u. ³ Cristona'me jünisosingaja'ñejeju rekoñoopi Ũcuauuna'me pa'iju Dios neenaa'me musanukona. ⁴ Ũcuauji Cristo musanukonare pa'iche mamare ĩsisi'kuu'mu. Repau jo'e rairumu Ũcuaujana carüni Repauuna'me chũ'uju pa'ijanaa'me musanukona.

Aperumu pa'isi'ena'me mama pa'iche'te kuamu

⁵ Jã'aja'ñejekuna musanukona cu'arekoñoã cu'ache cho'ouache cuasache'te peore juvoju ũhasojũ'u, ija'chere: rñjoromi peonare romineeñe, ñjuipai peonare umuneeñe, vajuchuache cho'oche, cu'a cho'oneeñe, cu'ache ũcuuache cho'ochena'me kurineeñe. Pãi kurineena kurichi'a cuasanajeju Diore cuasama'ñe tũosiva'nare pojocheja'che cho'ome. ⁶ Jachaju jã'amajñaruã cho'onare pãi pe'ruk cu'ache ti'jñeñe chũ'uja'mu Dios. ⁷ Aperumu musanukona ũcuachi'a jã'amajñaruã cho'oju pa'isinaa'me. ⁸ Jã'ata'ni jã'aja'ñe cho'oche'te peore masirepa ũhasoju pa'ijũ'u chura: pe'ruche, teache, chekunare cu'ache cho'oche, chekunare cu'ache cutuchena'me vajuchuache i'kache. ⁹ Ũcuachi'a sãĩnechi'a joreju pa'imanejuũ'u, ũcuare aperumu pa'isi'ena'me cho'osi'e jo'kasosinajeju. ¹⁰ Chura musanukona rekoñoã mamarekoñoã care'vacojñosinajeju pa'iche mamare pa'ime. Dios maire cho'osi'ku si'arumu cho'okaiu pa'imu, maipi Repau pa'iche'te masiju Ũcuu pa'icheja'che si'arumu na'a re'oja'che paapu chini. ¹¹ Jã'ajekuna chura ija'che cuasama'ñe pañu: griegopai pa'ichena'me judiopai pa'iche, jikora'muru chã'tiru pa'ica'niru chuto

tɯacojñosina pa'ichena'me cho'ocojñomanesina pa'iche, päirepa pa'ichena'me tiipäi pa'iche, chëa paacojñona pa'ichena'me chëa paacojñomana pa'iche. Jã'aja'ñejë'e cuasama'ñe Cristo neena pa'ichechi'a cuasaju pañu mai. Peore Paakuji maire ùcuanukore paaku'mu Repau.

¹² Dios musanukonare Repau neena paapu chini oi chëa paamu. Jã'ajekuna pa'iche mama pa'inajeju chekunare päi oirepache oiju re'oja'che cho'okaiju, “Na'a ruu masakummu chu'u”, chiima'ñe, pekeru pa'iju pe'ruma'ñe pa'ijũ'u. ¹³ Sãinechi'a ke'rema'ñe pa'iju, musanukonare chekuna cu'ache cho'oche cuasamanejũ'u. Dios musanukona cho'oche cu'a jo'e cuasama'ñeja'ñe chekuna musanukonare cu'ache cho'oche jo'e cuasamanejũ'u. ¹⁴ Jã'aja'ñe cho'ojũ ùcuachi'a chekunare oiju si'arummu re'oja'che cho'okaiju pa'ijũ'u. Jã'aja'ñe cho'ojũ pani re'oja'che ja'me pa'ijanaa'me musanukona. ¹⁵ Cristoji cho'okaiuna musanukona rekoñoã re'oja'chechi'a pa'ijũ'u. Ûcuachi'a Cristo ca'nivũ ùcuate'eca'nivũja'ñe pa'inajeju rekoñoãpi re'oja'che pa'iju ùcuanuko re'oja'che ja'me pa'ijũ'u. Jã'aja'ñe paapu chini chëa paamu Dios maire. Ûcuachi'a si'arummu pojojũ, “Re'orepamu”, chiiju pa'ijũ'u Repau'te. ¹⁶ Cristo chu'ore asa chëa si'arummu cuasaju sãinechi'a masi che'choju re'oja'che chu'vaju pa'ijũ'u. Dios musanukonare cho'okaiche'te cuasaju Repauni pojojũ Dios ujare ujaju pa'ijũ'u. ¹⁷ Musanukonapi cho'omajñaruãre ùcuauamajñaruãre cho'oni jã'apãani chu'o cutuni si'arummu Maire Paaku Jesús neena pa'iche pa'iju re'oja'che pa'ijũ'u. Ûcuachi'a Ûcuauji cho'okaiuna si'arummu mai Ja'kuni Dioni, “Re'orepamu, Ja'ku”, chiiju pa'ijũ'u.

Ùcuanukore chu'vache'me

18 Rũjoromi, mũũjũpãi chũ'uñe jachama'ñe cho'oju pa'ijũ'u. Maire Paaku'te cuasana pa'iche'me jā'a.
 19 Ūjũpãi, murũjoromi oiju repanare pa'ivesache cho'oma'ñe re'oja'che cho'okaiju paajũ'u.

20 Chii, mũja'kupãi chũ'uñe jachama'ñe peore cho'oju pa'ijũ'u. Jã'aja'ñe cho'oju pa'inare pojomu Maire Paaku Dios. 21 Puka'kupãi, musanukona chii'vanare ruarepa cuajare chũ'uju pa'imanejũ'u, repanapi pe'ruju, "Pani etajani re'oja'che pa'i cuasoma'ñea'me ie", chiimaneaju chini.

22 Chekunare chẽa paacojñova'na, icheja cheja pa'irumu musanukonare paana chũ'uñe jachama'ñe peore cho'oju pa'ijũ'u. Repanapi ña pojoajũ chini repana ñarumachi'a re'oja'che cho'oju pa'ima'ñe, ũcuarepa pa'iju Dioni cuasa, vajuchoju, repana ñamarumujẽ'e repana chũ'uñe masi cho'oju pa'ijũ'u.
 23 Musanukona cho'oche ũcuauache'te cho'oni rupũ päire cho'okainaja'ñe cho'oma'ñe masi cho'ouache cuasaju Maire Paaku'te cho'okaicheja'che cuasaju cho'oju pa'ijũ'u. 24 Musanukonapi re'oja'che cho'oni Maire Paakujĩ isikuna ruu re'oja'chere koojanaa'me, re'oja'che cho'osi'e ro'i. Cristoa'mu musanukonare Paarepakũ. Ūcuauuni cho'oche cho'okaiju pa'ime musanukona. 25 Jã'ata'ni cu'ache cho'ona Diopi te'enare na'a ruu oima'ñe ũcuapa'ruvachi'a oiu cuasakuna ũcuauko repana cu'ache cho'osi'e ro'i ro'ijanaa'me.

4

1 Chekunare koo paana, musanukona paanare cu'ache cho'oma'ñe re'oja'che paajũ'u, iere cuasaju: Maire Paaku Dios Cunamu Pa'iku musanukona cho'oche peore ñaku'mu.

² Si'arumũ ũcuanũko Dioni s̃ejũ pa'ijũ'u. Ñarepajũ pa'ijũ Repaũni pojojũ, “Re'orepamũ, Ja'kũ”, chiijũ pa'ijũ'u. ³ Chũkũna'te ũcuachi'a Repaũ'te s̃ekaijũ'u Ũcuajũ cho'okaiũna p̃aipi Dios chũ'o chũkũna chũ'vachũ'ore asaa'jũ chini. Chura, repa chũ'o Cristo pa'iche aperumũ kuamanesichũ'o chũ'vakũjekũ p̃a ch̃ẽavũ'ere pa'imũ chũ'u. ⁴ Ũcuachi'a chũ'upi Repaũ chiiche'te cho'okũ Ũcuajũ chũ'ore asamasire'oche chũ'vakũna p̃aipi asa ch̃ẽaa'jũ chini, s̃ekaijũ'u Repaũ'te.

⁵ Masi cuasajũ Diore cuasamanare re'oja'che ja'me pa'ijũ'u. Repanare chũ'vare'orumũ si'arumũ chũ'vajũ pa'ijũ'u va'sesomanẽũ chini. ⁶ Repanare cutuni si'arumũ re'oja'chere asare'oche i'kajũ pa'ijũ'u, p̃aipi mũsanũkonani Dios pa'iche'te s̃ẽeto i'kamasiũ chini.

Tocha pi'ni chũ'o saosi'ea'me

⁷ Mai majap̃aijũ'ia chũ'u cuasakũji Tíquico chũ'u pa'iche'te sa kũaja'mũ mũsanũkonare. Maire Paakũ'te chũkũnana'me cho'oche rũa masi cho'okaiũ pa'ikũ'mũ repaũ. ⁸ J̃a'ajekũna mũsanũkona pa'ichejana saomũ chũ'u repaũ'te sa kũaũna chũkũna pa'iche'te asa masijũ na'a rũa pojojũ paapũ chini. ⁹ Mai majap̃aijũ'ia mai cuasakũ Onésimo mũsanũkona pa'icheja cakũ ũcuauũna'me saimũ. Maire Paakũ'te Jesure cuhasoma'ñe cuasakũ pa'ikũ'mũ repaũ. Repana ka'chana sani icheja cho'ocojñoñe peore kũajanaa'me mũsanũkonare.

¹⁰ Aristarco chũ'ũna'me ivũ'e p̃a ch̃ẽavũ'e pa'ikũ ja'me chũ'o saomũ mũsanũkonare. Bernabé majap̃aijũ Marcos ũcuachi'a chũ'o saomũ mũsanũkonare. Aperumũ chũ'u mũsanũkonare, “Repaũji mũsanũkona pa'icheja sani ñato pojojũ re'oja'che cho'okaijũ'u repaũ'te”, chiiũ chũ'vakũ chũ'o saosi'e asaasome

mʉsanʉkona. Jǎ'ajekʉna chura jǎ'aja'ñe cho'okaijũ'ʉ repaʉ'te. ¹¹ Jesús Justo ũcuachi'a chʉ'o saomʉ mʉsanʉkonare. Repanachi'a judíopǎi Jesucristo'te cuasana chekʉnapí Dios chiiche'te cho'oju paapʉ chini chʉ'ʉna'me chʉ'vame. Chekʉna judíopǎi Jesucristo'te cuasanata'ni Dios chʉ'o chʉ'vama'me. Chʉ'ʉ suma'ñe cuasakʉ oirʉmʉ ũcuana re'oja'che pa'iche'te cuasani na'a pojokʉ pa'iku'mʉ chʉ'ʉ. ¹² Mʉsanʉkona pa'icheja cakʉ Epafras ũcuachi'a chʉ'o saomʉ mʉsanʉkonare. Jesucristo'te cho'ochē cho'okaiʉ pa'iku'mʉ repaʉ. Mʉsanʉkonare si'arʉmʉ Diore sēekaiʉ pa'imʉ repaʉ, Ũcuaju cho'okaiʉna Repaʉ'te cuasache'te ũhasoma'ñe masi cuasajʉ Repaʉ chiichechi'a cho'oju paapʉ chini. ¹³ Repaʉ Epafras mʉsanʉkonana'me Laodicea vʉ'ejoopo pa'inana'me Hierápolis vʉ'ejoopo pa'inare cuasakʉ rʉa oiu cho'okaiʉ pa'iche ñakʉjekʉ kʉamʉ chʉ'ʉ. ¹⁴ Lucas, ũko cho'omasi ai, mai cuasacojñokʉ chʉ'o saomʉ mʉsanʉkonare, Demas ũcuachi'a.

¹⁵ Laodicea vʉ'ejoopo pa'inare mai majapǎijanare chʉ'o sa kʉakaijũ'ʉ. Ninfa'te ũcuachi'a chʉ'o kʉakaijũ'ʉ, repao vʉ'e Jesure pojoju chi'ikuanupʉ ũcuachi'a. ¹⁶ Ija'ova utija'ova tochasi'e ña pi'ni Laodicea vʉ'ejoopo pa'inani Jesure cuasakuanupʉna saojũ'ʉ ñaa'ju. Mʉsanʉkona ũcuachi'a chʉ'ʉ repanare tocha saosija'ova ñajũ'ʉ. ¹⁷ Arquipo'te ija'che i'kakaijũ'ʉ chʉ'ʉre: “Mʉ'ʉpi cho'oa'kʉ chini Maire Paakʉ jo'kasi'e peore masi cho'o pi'nijũ'ʉ”, chiijũ'ʉ repaʉ'te.

¹⁸ Chʉ'ʉ, Pablo, inʉkorʉ chʉ'o saomakarʉchi'a chʉ'ʉrepaʉji tochamʉ. Chʉ'ʉ pǎi chēavʉ'e pa'iche cavesʉma'ñe cuasajũ'ʉ. Diopi mʉsanʉkonare rʉa re'oja'che cho'okaʉ. Re'omʉ.

Pablo

Dios Chu'o Kuaphuro

Koreguaje: Dios Chu'o Kuaphuro New Testament

copyright © 2009 Wycliffe Bible Translators, Inc.

Language: Koreguaje

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 4 Mar 2022

87a345ac-83c6-51ad-8750-17a703f38bcc